

s'estoyent efforcez d'augmenter l'Empire Romain : & non seulement à eux, mais aussi à leurs meres, femmes, sœurs, comme nous voyons en plusieurs medalles. Et specialement ceste appellation de Diuus, fut attribuee à cestuy Iulius Cesar, ainsi que nous apprenons de plusieurs medalles, esquelles son successeur Octavian Auguste est nommé seulement & simplement *Diui filius*, c'est à dire, fils de Iulius Cesar (c'est à sçavoir, par adoption.) Et de ce, comme j'ay leu quelque part, les Romains appellerent *Diualia* simplement, la commemoration & feste qu'ils firent par chacun an, dudit Iulius Cesar apres qu'il fut mort. Outre ce qu'incontinent apres le meurtre commis en sa personne, le peuple luy dressa vne colonne de pierre Numidique au milieu de la grande place & marché, à laquelle bien longuement on fit sacrifices & vœux : voire on fit souvent accords & appointemens de facheux differens, en faisant serment par le nom de Cesar, ainsi que raconte Suetone : lequel aussi adiouste puis apres, que le peuple n'eut pas petite opinion que son esprit fut veritablement monté au ciel. Car aux premiers jeux funebres que son heritier Auguste fit en son honneur, il apparut par sept iours continuels vne estoile cheuelue, ou comete, de celles qui sont dictes des Grecs *Pogonia*, c'est à dire, barbues, & ayans longs cheveux. Et pour ceste raison on adiousta à ses Statues & medalles vne estoile au dessus de la teste, ainsi que se voit en ce present portrait, & presqu'en toutes medalles & graueures en pierres fines qui ont esté faites apres sa mort. J'ay deux ou trois medalles d'argent, ayans d'un costé la face d'Auguste, & au reuers seulement ceste comete, ou estoile cheueluë, & ont esté faites en memoire de cecy. J'ay aussi autres medalles d'argent à la face dudit Iules Cesar, ayans vne estoile derriere la teste, avec l'inscription *Cesar Imperator*, faites de son viuant : mais telle estoile n'est point celle dont nous parlons icy, ains, à mon iugement, est *sidus Veneris*, c'est à dire, la planette de Venus, de laquelle il se vantoit estre sorti par *Aeneas*, & *Iulus*. Et qu'il soit vray, le reuers en fait foy, auquel est empreinte vne *Venus genitrix*, c'est à dire, Venus mere, avec l'inscription, *Publius sepullius Macer*. Voyla comme il faut, es medalles & graueures de Iules Cesar, distinguer ceste comete dont nous parlons, de l'estoile, ou planette de Venus, qui se voit en aucunes, comme dit est. Or qui voudra plus amplement entendre les differences des Cometes, lise Seneque au liure septieme, & les autres autheurs qui en ont particulierement escrit. Reste à declarer le *Lituus* qui se voit derriere la teste de nostre Iules Cesar. *Lituus*, tel

Diualia.

Lituus.